

欽
定
全
唐
文

欽定全唐文卷二百二十九目錄

張說九

贈戶部尚書河東公楊君神道碑

右羽林大將軍王公神道碑奉勅撰

贈吏部尚書蕭公神道碑

故括州刺史贈工部尚書馮公神道碑

唐故瀛州河間縣丞崔君神道碑

延州豆盧使君萬泉縣主薛氏神道碑

贈太州刺史楊公神道碑

常州刺史平君神道碑

欽定全唐文卷二百二十九

張說九

贈戶部尚書河東公楊君神道碑

若夫孝在揚名忠歸令德事因感激氣概生焉時逢屯難
勲業成焉桃李灼灼不自言於蹊逕松柏青青不受令於
霜雪窮獨善而無撓達兼善而無矜子曰君子哉若人斯
吾河東公之謂也公諱執一字某宏農華陰人也司徒觀
王雄之曾孫鄆州宏農公續之孫潞州胡城公思止之子
戶部尚書相國執柔之弟觀公侍中恭仁公之伯父也安

德公尚書令師道公之叔父也在隋則二代五公在唐則一門三相公台輔積慶稟清明之識河岳會靈資磊落之氣體剛毅深於城府蘊規畧長於襟帶戲爲軍陣敵國之勢幼成請學兵書長城之望早集年甫十六先君捐館七日絕飲三年泣血縞綬有制儒家歎其從禮柴棘加等議者憂其死孝清門祖德勢胄能貧太夫人在堂有致力之養非躬藝黍稷不以供甘旨非手樹桑麻不以薦絺纈年逾一紀勤不知勞旣極安親之心方展事君之節乃濯纓璜渚獻策金門干當代之聖君論天下之成敗秦皇覽奏

屏左右而與謀漢帝聞言膝前席而不覺一見拔玉鈐倉
曹再見取尚食直長三見寘典設郎驟進直詞深觸權嬖
爲易之兄弟所嫉左授伊州府果毅又上封章帝用嘉納
加游擊將軍右衛郎將歷左清道率換右衛中郎押千騎
使總統貔武便繁肘腋故得協心五王戡勦二豎奮飛北
落推戴中宗嗣唐配天不失舊物以匡復勲拜雲麾將軍
右鷹揚將軍封宏農縣公賞未充庸且有後命增冠軍大
將軍右威衛將軍進河東郡公邑二千戶賦四百室俾之
鐵券恕其十死又賜天馬瑞錦珠盤瑤爵綵紋五百縑素

三千分三土之上腴處五等之高列琬戈紫綬環衛於鉤
陳玉璫黃流侍祠於清廟豈知釁結梁魯政出艷哲里克
納惠而爲戮萇叔城周而見咎彼五績之摧殯此三黜之
屯躋出爲常州刺史以太夫人羸老乞避卑濕特降中旨
轉牧晉州駙馬都尉瑯琊王同皎親賢地切休戚圖深安
劉之策未遂鍾室之災先及吏扇紛獄公陷關通貶徙沁
州刺史不知事仍長任夜魂九逝非北首而無歸晝戶重
局異南冠而同繫果能推分榮辱忘懷生死人不堪其憂
公不改其操久之盡削官封放還侍母梁山雨雪不隔曾

氏之思王畿風景來就潘園之養尋而大勲不廢天道復
反歸旣奪之井邑起故時之將軍擢衛尉卿復初封爵巖
巖劍山蜀之險要嗷嗷飛鴈人未安居飢渴仁明輯綏凋
弊又授公劍州刺史蔚彼黍苗樂我膏澤內憂遠計殞絕
逾時於是搏膺星奔徒跣永路雨不接乘夜不解纓因心
通禮朝流欽歎有命奪情除汾州刺史知團結兵馬哀訴
不允金革無違中國簡稽而有備單于遁逃而遠迹詔徵
爲涼州都督兼左衛將軍河西諸軍州節度督察九姓赤
水軍等大使公富以農政和以師律彰信蕃部赫怒軍容

斷匈奴之臂磧路安而不警張漢家之掖雪山開而無寇
遂攝御史中丞璽書勞俸綬賞稠疊又牧原州未發復授
涼州都督改右衛將軍使悉如故尋移許州刺史未到以
單于款關授右衛將軍檢校勝州都督兼處置降戶使懷
柔以德種落宜之徵還本官又兼原州都督旋屬降戶翻
叛河朔俶擾邊城聳蹙諸將無功強修連率夏州按察關
內羽書日夜俾還郡特公按甲待敵確乎不動虜騎畏威
竟無來掠向使迴避行於一步則攘竊啟於萬端十將耗
五數年未復旣而強公追媿朝端延賞徵拜右威衛大將

軍進檢校右金吾大將軍尋而即真禁衛肅然異於他日也皇上哀庶戮之不辜念羣胡之自孽大軍之後荆棘生焉乃命公攝御史大夫爲朔方元帥公剛腸疾惡擒奸摘罪曩將之所彌縫宿吏之所乾沒匿贓散廩一徵百萬矯枉過正衆口囂然改右衛大將軍無何復右金吾大將軍金刀更新髀鞬仍舊巖廊益峻徼道增清改金紫光祿大夫鄜州刺史人寬吏急猶前政也享年六十有五開元十四年正月二日薨於官舍闔境發喪列城望祭古之遺愛何以加焉天子傷之下詔曰故官某夙負名義早著勲庸

居內外之職備文武之任忠勤匪懈誠節無渝忽焉徂沒
情深悲悼可贈戶部尚書歸賙成喪有加恒數惟公以孝
敷聞以忠特達以幹述職以能典兵凡領郡十四將軍十
二再杖節鉞三執金吾一至九卿二兼獨坐儼有直道侃
無媚辭銀艾復乎舊德珪爵傳乎祚允全忠節於夷險與
福祿而終始諡曰忠公朝之令典也夫人新城郡夫人獨
孤氏左威衛大將軍贈益州都督卿雲之女也婦德母儀
中外師範開元四載先公即窆以今十五年六月合葬於
咸陽之洪瀆川禮也其孤濯汪等銜恤靡訴託詞疇識感

稱伐之垂文哀劬勞之罔極銘曰

堂堂楊公神密氣雄苦身難孝正國危忠落彼狡童樹此
帝功昔稱關西今也河東觀王之裔珠華玉麗重葉尚主
三朝嬪帝韡韡七德僔僔六藝公之亢宗鬱爲世濟涼鎮
西隅朔臨北胡天子授鉞將軍剖符青蛇入笥白獸銜珠
去持玉節來執金吾轉予爪士守於廊時明察號神仁恩
名子武都石折文昌星死素蓋歸飛黃泉已矣卜葬卷阿
哀榮孔多尚書鼓吹太平虞歌碑流雨迹松引風過獨封
茅土長誓山河

右羽林大將軍王公神道碑奉勅撰

維大唐開元十五年閏九月二十三日庚申右羽林大將軍持節河西隴右兩道節度使營田九姓轉運十副大使兼赤水大使專知節度事攝御史中丞判涼州都督上柱國晉昌伯薨於輦笔亭故也夫事君效命之謂忠殺敵榮親之謂勇干星襲月之謂氣逐日拔山之謂力有一於此名猶蓋代矧兼其四人何閒焉是晉昌所以錯落將星崢嶸山嶽者也公諱君臬字威明瓜州常樂人也父壽因公建績致位九卿臨難守死褒贈特進審塞翁之倚伏達蒙

叟之浮休老而益壯沒而立名者矣公威聲發於雷泉武
毅標於峒嶺小頭銳上猿臂虬鬚龍劍摧百勝之鋒虵矛
得萬人之敵拔自行陣果有呂蒙之才拜於壇場不爽韓
信之用始任鎮戍列班外府及郎將中郎至軍副率雖驟
移官守而恒在疆場郭知運推轂河源握符隴右公未登
一命事主將之旌麾不出十年代總戎之節鉞慷慨之士
以爲美談於是自驍衛將軍遷羽林大將軍旣督隴右兼
統河西綰塞垣之十軍佩節制之兩印大田多稼而屯廩
百億蒐乘籍馬而鐵騎數萬廼蹈赤山焚罽幕獵青鳥驅

犇牛噉鳴則七戎辟易烜赫則千里震動亭候恃其長城
廟堂賴其神將月獻戎捷歲行軍賞王侯無種屠狗起於
將軍戰伐有功爛羊超於都尉前後翻飛幕下奮躍行閒
跨軍典郡腰金冠玉者數十百人矣每至入朝奏謁升殿
論邊山川險易立成於聚米攻守方畧一決於前籌遙詔
置兵先合漢光之旨新書從事暗同魏武之心故得延譽
上騰風雲鬱其氣色恩榮下沓日月借其光輝當斯時也
躊躇攘袂三垂可以氣壓百蠻可以力制即敘者老生之
常談和親者豎儒之怯計安足爲神武非常之主道哉誓

請先拔犬戎次繫獯鬻盡區域於西海關郡縣於北荒輝
皇靈於天外圖壯節於雲閣其事如果曠古未儔惟君知
臣保斯言之可復何神與善負厥志而無成是年秋八月
吐蕃犯邊瓜州失守盜憎我將執致其親公以爲背父立
威非孝也頓兵從敵非忠也大義逼而忘家方寸亂而供
國其定計也戒列而出討賊盡狄而退殺身忠在孝先將
之道也公馳驛要謀而迴紇內叛以八九之從人當數百
之強虜然猶虺噉擊射殺傷畧半亭孤兵盡流矢橫及所
謂仆而餘威折而不撓矣嗟乎嘗膽之憤空結噉肝之怨

莫讎天子聞之黯然興歎人言以命許國夫豈忘其言哉
苟收必死之忠焉問不虞之過至矣蓋聖主推仁恕於天
下懸大信於後人愛欲其生懲晉侯再克之喜惡傷其沒
抱秦伯猶用之誠婉獨見之端豈常情所逮謀臣飲恩於
望表猛將感德於事外然後任人之固衆可知也乃下詔
追贈特進荊州大都督禮命窀穸加常二等死事之經也
公之伉儷曰武威郡夫人夏氏韓母築城之智孟光舉臼
之材拔棘解圍三軍懾其健婦崩城慟哭四海傷其孝妻
此又閒代之一奇一家之兩絕者也嗣子尚衣奉御承榮

天獎賜蘭星祥名寶禮義形於橋梓哀戚過於縗麻稟訓
帷堂克持門戶特奉恩旨收其二蔭飾柩玉關歸魂上國
以十六年十月詔葬於萬年縣見子之原鹵簿齊列方相
雙引京尹護喪史官頌石千乘送葬觀騾騎之威儀十里
開塋識龍驤之邱墓銘曰

合衆在仁正兵惟義將爲天目國命所寄曲乃老師輕實
兒戲安我封畧才難不易赳赳將軍貔貅絕羣超騰白地
騫翥青雲朝盛勇爵家榮戰勲衆聲飛譽帝曰予聞子聞
伊何甲兵繕肅屯積萬庾馬量百谷甘心犬戎指掌獯鬻

大畢當此單于可掬壯計先達王師未張城隳孤塞寇及
高堂忠先孝後取敵而亡外仇易復內變難防克日將戰
呼天不假岑彭詐客張飛帳下流鏑何人交錢去馬蒼皇
反復哀哉命也美殮姑臧寵歸芷陽東都門外南登路傍
高墳累累列樹行行父子同兆何殊故鄉詔刻金石義形
意氣隱善必書殤魂不諱事棄忠在生輕節貴嗟爾明靈
銜恩永慰

贈吏部尚書蕭公神道碑

仁以度心施物義以由道利貞孝以養志安親慈以教忠

有後舉四行之尤善成百代之餘慶蓋得之於蕭府君矣
公諱灌字元茂蘭陵人帝高辛之苗裔也元鳥受命敬敷
五德白雲入房網開三面微子封宋樂叔居蕭氏族之始
也相國下秦大夫師漢門閥之宗也大齊以肅竹膺期踐
皇帝之位大梁以木刃興運張天地之圖傳寶祚於一家
易鴻名於兩漢青蓋入洛重南國之衣冠白馬朝周盛西
雍之賓客公即梁宣皇帝之元孫明皇帝之曾孫大父南
海王珣入隋封梁國公纂德乾坤承靈睿哲舊邦雖改見
周鼎之時輕新社仍封知晉圭之必大考鈞中書舍人率

更令宏文集賢兩館學士學窮祕蹟文標宗匠廣博幽深
契神無迹溫良恭儉與道爲徒是謂啟迪後昆而焜耀前
烈者也公總山河之粹氣注日月之末光心根孝友器包
禮樂動躡思後故口無擇言照在機前故身無擇行加以
啟蓬山之塞路入藏室之元關四科得游夏之門六藝取
鍾王之雋年十八明經高第補代王功曹王昇儲改通事
舍人又換內直監曳裾西苑擅文士之場東帶東朝首正
人之列尋以外艱去職王戎死孝時論憂之閔子免喪哀
心未盡乃不就祥縞不撤几筵者久之或曰懷其寶迷其

國行其志約其親可乎哉公曰吾過矣不得已而外除不
擇官而祿仕拜國子監丞以婚姻之故出爲甘州司馬徙
集嵐二州司馬轉渝州長史其從政也反身以惠下推誠
以敬上老吾老以施教幼吾幼以子人執是心也何往不
濟故厯佐之郡必僻陋知方戎蠻變俗狼戾馴軌貪饕寡
欲迎新者望風而歌來暮送故者計日而戀不足詩云淑
人君子正是國人能長人之謂也太夫人在堂有羸老之
疾公因使入計得扶侍還京下巫峽之波上當陽之坂展
轉在側殷憂厯時席不安枕衣不解帶及板輿長稅遂扶

杖不起子春視疾加損徒勤石建執喪悲哀自絕永淳元年八月寓居穰縣終於苦蓋春秋五十有七先君之服也三年有終公過時不釋聖善之喪也五十不毀公戀親滅性君子曰禮也夫可謂至矣夫人京兆韋氏祖雲起兵部尚書父師實秦州都督公卿令族蘭杜齊芬鳳凰飛鳴始正家道珠玉秀色終高母儀年五十有四長壽元年十月逝於京師布政里粵以二年二月辛卯合葬於少陵原之先塋禮也其孤嵩克戴聖君以宰天下大福再成於身後湛恩廣運於泉路開元十七年仲冬癸丑詔曰中書令嵩

父某毓粹冲和降靈神象言入精微之奧迹登聖賢之軌
位不充量道足庇人松檟雖幽音徽不昧宜承追遠之慶
俾崇冢宰之榮可贈吏部尚書同日詔曰嵩母韋氏門傳
一經行包四德才淑冠乎邦族言範光乎母師誕茲寶臣
作子良弼封其石窳俾承土宇之榮表以金章永闕珎璜
之飾可贈魏郡夫人於是建宗廟修禮物榮君後命告我
前人遠哉心乎一思一敬之感會也如是垂裕立訓克家
揚名遺愛至矣慎終備矣東武公之子孫共連塋闕南城
侯之夫婦同刻碑銘詞曰

維蕭係宗出宋之子天命齊歷河圖梁紀累帝重王雍容
文史是生邦俊世濟其美仁義孝慈中和庸祇文章鳴鳳
禮樂元龜碣館枚馬儲闡潘賈人望國華風流儒雅歷佐
列郡政成休問行立時法言垂後訓沒而益榮追位冢卿
哀感有情事傳無聲墓門松平碑字金生不知千古誰遊
九京

故括州刺史贈工部尚書馮公神道碑

金之爲寶百鍊而惟精玉之稱德久幽而不昧聖人美焉
君子比焉可鑠也不可奪其剛可毀也不可污其潔偉哉

馮公秉斯操矣公諱昭泰字遇聖長樂人也說學於古史
豈不聞舅氏之厥初乎畢公建德於周畢萬大名於魏別
封之裔遂氏馮城秦則丞相並時漢則將軍重世積仁鍾
慶王者鬱興閒晉南浮因燕北號家變成國爲天下雄勲
業競五伯之先子孫齊二王之後公即昭成皇帝之十代
孫也高祖大將軍隨州刺史長山公謙以寇恂之才翊戴
周武曾祖兵部尚書左僕射魏國公世基以曹參之力經
濟隋文大父尚書左丞檢校御史大夫少府監揚州長史
安昌公長命以佳吏之名勤勞王室考仁高亮無祿子道

不究故公幼而襲安昌公焉清明激激標格峻豎夏翟耿
介無矯飾於韋絃寒松青冥不受令於霜雪專經覩奧習
法精理起家左奉裕改讓賢府果毅換文州司馬爲酷吏
所陷罷官久之調榮州長史屬城慢法按而繩之入計會
府仇家橫訟明勅杖其愬者遷公宋州司馬朝廷翕然知
有王法復假右臺侍御史江南道廉察使類會高等加朝
散大夫進潞州長史堆岸受湍獨醒見嫉轉湖州長史公
束濕不回聚蚊交訕貶爲饒州司馬未行降使詳覆拜鄂
州刺史制曰卿志氣剛勁操履貞潔厯佐藩條咸有聲稱

詰奸糾繆不避強禦苦節清威若淩霜雪頃因讒毀遂有
貶降使者案問皎然明白俾從優獎特加寵命其在江夏
異政風行入爲太子家令兼知內外鑄錢事國泉是殷盜
鎔乃絕河朔淫雨帝思作乂俾公檢校邢州刺史散有調
無人忘歉歲帝乃璽書勞焉其旨曰卿忠於事君簡以臨
下忘私徇公之美歌謠所載擒奸摘伏之奇吏人攸仰雖
陳朔之貶黜邪慝王業之斥除貪殘無以加也一郡清靜
副朕意焉其後以戚累移睦州刺史復爲羣小所譖左授
泉州司馬未之任又貶榮州司馬公砥節荒服天高聽卑

旋除温州長史俄復舊階拜括州刺史水國瀝洳告疾言
歸景龍三年六月十三日終於蘇州之逆旅春秋六十有
五正人歎息舊莅傷感公清白傳家信義高世門有奇士
室無長物夫其善於鈎距長於衿帶法嚴令峻人寬吏急
當官而行不避讒慝之口除惡務本不求愷悌之譽出入
從宦十有六職以謗獲貶者五洗謗特遷者四不曰忠乎
將無悔於九死不曰直乎焉往而不三黜故人謝而名益
著迹遠而風可懷也皇上志其持法不撓贈大理卿本其
坐樹無言諡之曰節窳窳之事一以官供哀榮之禮被於

存沒是時天子嚴謁山陵訓人追孝推恩庶物瀉澤幽泉
公長子少府監紹正次子給事中紹烈並構層堂仰延榮
贈乃贈公工部尚書君子曰孝必錫類忠則不墜臧孫達
其有後乎鄭公業爲不亡矣夫人瑯琊君左相邢公及善
之女垂拱二年三十六而天後夫人彭城君鴻臚卿善因
之孫女景龍三年五十有五而逝所謂齊姜昭前邦媛輝
後碧樹先落悲同孫楚之妻紅蘭漸苞貴在馮勤之母以
開元十八年十月壬寅葬我節公於長安縣高陽原夫人
王氏劉氏祔焉禮也長子紹正少府監第四子紹忠未仕

第五子紹烈御史中丞孝乎二連之心思崇三絕之美魏
主來顧賞幼婦之碑秦師不侵尊死士之壠揚名稱伐道
遠乎哉銘曰

古之志士忠不違難倬哉馮公矯此雲翰囂囂羣小彼何
足算屢困忠直天下改觀經用百年窮達相半貽慶二子
雙承天渙嚴嚴大理人命是懸聖朝表贈王道無偏六卿
冬官百工攸序韓稜雖沒龍泉可許邱陵鼓舞兮改谷移
山歲月奔波兮有去不還惟德音與頌石傳不朽於人閒

唐故瀛州河閒縣丞崔君神道碑

蛟龍蟠乎沼無雲雨而不翔君子志於道無運命而不彰
然則變化者是神靈之末富貴者非德行之本守其真樂
其分不其至矣世有人焉君諱漪字某博陵安平人在唐
爲姜姓炎帝之孫也在周爲崔氏齊侯之允也遙源長發
洪河之水接於天層盤列秀太行之山拒於海東觀所以
美其文宗北州所以貴其清族魏冀州刺史簡公諱纂君
之高祖也齊散騎常侍諱舛君之曾祖也隋大理少卿諱
世立君之大父也故祁陽令諱抗君之皇考也承百代之
隆慶總五德之清淳孝友忠肅宣慈恭儉好古博雅鄰幾

亞聖盈而若虛漠而無象非夫入周公之廟升孔子之堂
則憲章禮樂鮮得其門而覩矣弱冠以門胄入國學舉進
士母弟汲以明經同年擢第大理卿張公文瓘人倫之表
也目君曰昔兩劉並舉以爲騁二龍焉今兩崔齊飛可謂
儀雙鳳矣縉紳景慕憧憧往來徙宅就居投刺成市若衆
流之赴壑也及親而仕盤桓利貞解褐澤州晉城尉降爲
光州安樂尉換蘄州黃梅尉轉河閒丞凡更三尉佐四邑
體公綽之不欲勵伯夷之高操臨事以簡御人以寬雖爲
小政必有可觀故八使巡風再薦清白河上遺老江濱舊

吏吟咏餘聲祖述前事人到於今稱之若夫碧樹煙藹於
江潭紅荷藻耀於澤畔寶貝烱光於空浦美玉明潤於斷
岸不爲珍輿瑤輦之飾前殿後池之玩誠自得焉必將有
賞心之所歎也況乎殿邦光國之寶罇俎柱石之器道爲
帝王師言爲天下利已而稅遠駕於窮轍頓高才於下位
亦無惜焉固將有知音之所歎也垂拱元年奉使上都邁
疾終於時邕里之旅館享年六十有二夫人河東裴氏湖
州治中懷儉之孫滁州司馬昉之女也稟訓華室作合高
門嗣徽先姑克和娣婦德容之盛圖傳罕有喪親過毀葬

華朝落儀鳳中卒於鄭春秋二十有八長安三年春二月
合葬於金谷鄉邛山之陽禮也北據高岡連隴南面大道
禁林上國皇州川原指掌仙門宰樹碑闕相望元靈嘉之
是安是宅嗣子日用景龍中爵安平縣子職兵部侍郎夙
遭閔凶不承誨誘慎終追遠克家用譽蒙聖主拔竒賞異
絕等超倫三顧赤墀之下一舉青雲之上祿廩所資吉蠲
致美實先人宥十世降百祥之所及也永惟官不達者身
不登乎明堂行不夸者名不書乎史冊則韜光隱德之緒
俾後代將何述焉夫銘景鍾稱茂伐彼大夫之事篆豐石

揚令名此孝子之志辭曰

維嶽建國厥生炎皇維師尚父諒彼武王古人言曰必齊
之姜齊之丁公後有崔子因邑命族世濟其美黃鵠倚歌
雕龍擅史倬哉嗣武含章挺生以蒙養正用晦而明混之
不濁人莫能名學以崇道文以慰志垂其雲翼坦然卑位
祿逮吾親榮非我仕皇皇上帝建官惟賢有人在下胡寧
捨旃孰云輔德曾不永年展矣邦媛宜其家室友如樂諧
皎如月出重壤旣兆終天偕畢北陵墳邱松檟千秋金碑
石樓祇令人愁東都城郭通澗瀍洛飛橋連閣金管迭作

金定合月三
卷二十一
人世之轉然兮山川之宛然兮德音之緬然兮

延州豆盧使君萬泉縣主薛氏神道碑

或稱達性命者齊死生之域達憂怯者一修短之數斯蓋
無心之倫耳焉足與議於情哉何則雲虹滅影詞人於是
詠謠華秀從風君子爲之歎息豈不以對仙麗之景懷變
化而遺戀在韶蕊之節悼零落而偏憤吾見豆盧氏之子
於其伉儷有焉縣主諱字姓薛氏河東汾陰人也大父駙
馬都尉奉宸將軍諱瓘尚城陽公主考駙馬都尉散騎常
侍諱紹尚鎮國太平公主其在昔也夏有車正先封周有

薛侯爭長其在今也五宗姻於帝里重葉母於王姬河水
經天上積星辰之氣霍山震地下多珠玉之林縣主幼而
敏惠長而洵淑貞義孝烈之傳吉凶賓祭之儀一聞成誦
絃綖絢組之製渚芼醢羞之品一見懸解至乃鶴迴清汎
蠶聚崩雲月韻玫砧花穠綵樹婦人能事咸臻妙焉大聖
天后鍊石補天有王母之神器分茅列土啟弄孫之美邑
封猶有禮義引而親天授三年四月內封萬泉縣主天愛
下流日親上簡乘龍之舉和鳳爲難絡八紘以選門奄千
官以求俊夫以龍圖帝寶折步搖之華源虎戟侯門襲京

燕之雄胃人之信美帝用嘉焉以萬歲登封元年仲春旣望歸於豆盧氏六官送行百僚供事迺以鑾輅遣以翟車環珮冕旒璆然在馭黼藻朱黛爛其盈門詔婚之禮於焉爲盛爾乃移其愛敬以事舅姑伸其友恭以諧公妹舉宗洽比如鼓瑟琴每至婚姻會同少長咸集珩璜節步金翠耀首有婉孌之心無驕矜之色晞眄睵者若遲日之映漣漪瞻詞氣者猶光風之轉蘅蕙加以引納懷和饋分周賑踈屬自附窮歸忘窘故蘭行彰信於閨門而蕙風滿盈於邦國諒惟琬玉之性自美抑亦劬勞之訓致焉中宗孝和

皇帝雲迴南土龍見東京二儀更闢九族咸敘望我兄兮
公主贊陶鈞之力曰吾甥也縣主開邑井之賦神龍元年
春加實封三百戶縣主旣通籍門闌奉御又尚司殿省天
子巡遊宮觀觴樂池臺我有周親無時不從主家外幸比
齊后而聯恩子壻中參與趙王而均理或醉飽踰度寒燠
未平何嘗不御藥在門王人接路當時厚澤莫之尚也景
龍四年二月以奉御出爲丹延二州刺史保傅下堂隨朱
轡而同去輜輶入郡與阜蓋而齊飛辭宮闕而歲闌戀庭
闈而日遠肥泉永歎邪氣攻衷楚祝招而不來秦醫來而

不及景雲元年八月二十一日傾逝於延州之解舍春秋
二十有四美玉褫顏明珠晦色平陽舊宇遂無望於歸寧
懷縣新文空留連於永逝有子三人西華南容東里等或
齟或岐呱呱而泣天何以罰神其忍之冬十有二月五日
歸葬於長安之洪瀆原窀穸營護有命加等器服祖遣率
由舊章生之也榮葬之也禮若夫柔嘉好合善之元也肅
雍降貴謙之道也山河其德容潤廣也能羆其祥祚允大
也總衆美於修嫿馳落暉於小年此所以哀中之又哀也
昔袁亡馬氏蔡筆斯奮鄭喪曹姬潘文亦作矧茲內範事

華無媿砥望夫之石以表崇邱緝幼婦之詞將傳終古銘
曰

薛之重祖胄軒國禹相殷侯周氏其土宇英英白雲鬱彼
河汾公門蕃衍銘鼎氛氲則仁則義則戚則勲餘慶介祉
誕靈女士中宗之甥鎮國之子皎如霜雪華如桃李舜族
爰序堯封咸秩萬泉開源三百其實守盛以儉居沖不溢
亦旣鳴鴈宜爾家人謙恭下下撫納親親傾財致客對饁
如賓我有邱第前臨黃道我有池塘却望青草漢輦停暮
秦簫拂早歲月易忘歡愉難保良人出守將命北徂與子

偕往飲別東都望母腸斷辭家淚枯露萎莖草霜酸衆雛
魂兮何歸京兆之野葬於何處杜陵之下巖巖雙闕列列
行櫓勒是徽音以觀來者

贈太州刺史楊公神道碑

公諱志誠字某宏農華陰人也厥初生人爲姬伯之祖因
邑命氏有楊侯之允其後東陵奮而開國西漢盛而移關
門廬隱隱亘連桃塞之上碑闕巖巖蔽滿華山之下明德
之後世有人焉大王父隋直閣將軍岷蔚撫豪道五州刺
史邢國公諱貴大父故右衛副率慈汾二州刺史靜公諱

譽考故常州刺史工部侍郎鴻臚卿金紫光祿大夫散騎
常侍太子少師贈儀同三司上柱國鄭國懿公諱崇敬若
夫家聲代業累德積仁故以克隆前統光啟來葉矣公稟
純嘏之粹靈漸軌物之名教端操以正己崇讓以與人勵
精以探道善問以毓德學無不達藝無不周成童有傾矚
之望旣冠爲宗匠之表年十三調太宗挽郎尋補潞王典
籤大夫門子執紼橋山王國詞人曳裾睢苑皆一時之選
也明慶中詔郡國舉賢良公對策天朝無能出其右者遷
太子通事舍人再舉高第徙國子監丞坊監清流才地兼

擇東朝束帶銀榜增華西序影纓環林益潤高宗接千歲
之統嗣百王之業封岱岳禪云亭稽於舊章俟茲通博乃
除公禮部員外郎祀事克明大典攸序建邦分職得人者
昌吏曹居六官之首郎官盡一臺之妙又轉公吏部員外
郎準的文昌羽儀丹地丁太夫人憂去職公至行純篤幾
於滅性雖杖經外除而柴瘠加等門人記其喪禮天子憂
其死孝服闋授幽州三水令曳尚方之舄鳴單父之琴志
道不矜其大才勤政無陋其小邑美聲流於幽籥惠化匝
於周原又應文擅詞場舉策試爲天下第一敷陳聖謨啟

沃明主究天人之際建皇道之極如有用我者其爲東周
乎朝廷納賈生之言排汲直於外乃拜公隴州司馬未及
赴官遘疾卒於長安之私第春秋若干王祥未施於邦政
陳寔近終於邑長位不充德其如命何神龍初中宗克復
丕業格於文祖廼睠從臣緬懷先正以公二子在章綬之
列追贈公使持節太州諸軍事太州刺史非夫立言不朽
陰德陽報安有藐諸孤而隆家旣沒世而榮號者哉夫人
天水趙氏殿中監武權公某之女也受訓公宮作合君子
言容賁於圖史德行循於法度六姻之內宗焉始有輔佐

之力卒延門戶之寄初公之捐館也九子呱呱哀縗喪位
賴夫人是顧是復日就月將徙宅依仁闔門成訓三十年
內八子登朝廷交虎綬之華門接魚軒之軫某年月日封
梁國太夫人景龍二年五月七日終於長安之延壽里閒
者遭家遷播几筵靡託而今蒙國昭洗情禮獲申以先天
元年十月二十五日合葬於少陵原禮也第二第三子夫
人在堂而沒長子第八子夫人在殯而亡今並列於塋兆
用嘉魂魄長子故兵部郎中徵中子前武衛將軍泚永懷
徽烈思勒銘頌郎中昔嘗緒言意感延州之許將軍今復

哀託情深舊館之悲高跡難名短詞莫逮採諸故老忝存
梗槩其詞曰

昂昂楊君秉心泉懿大河靈岳含光毓粹學妙研精文道
逸思行爲時範言爲故事存蘊令德沒揚虛位善慶克家
哀榮乃備嗣姑稱妣敬妻曰冀後有母儀千載一致貞墳
土壟同封此地芳烈悠哉金生碑字

常州刺史平君神道碑

公諱貞春字密一字閒從燕國薊人也蓋晉之公族有韓
國者列於世家韓之餘子食平邑者因爲氏姓有漢丞相

改造繡衣在魏薊侯宅茲元社故瓜飀縣於三輔枝葉盛
乎兩燕魏齊之閒世濟其美公即北齊司空公鑒之曾孫
祕書郎子敬之季孫故偃師令直容之叔子鍾積慶之洪
允包太和之粹靈敦龐沈靜直方簡易仁義根心政理率
性度以禮義文以詩書戶部尚書清河崔知悌朝望人倫
公之文友深賞延譽遠近宗焉始以司成館進士補廬州
慎縣尉刺史盧寶允舉器藏下僚轉冀州大都督府曲沃
縣尉換晉州洪洞縣主簿北平陽道昕氣尚標舉河東裴
知禮鑒裁精拔陽推以孝友資身裴亦薦以經邦興化徙

雍州新豐縣尉盧少儒引爲檢點判官差卒選校小大推
允休議登聞擢監察御史裏行奉使黔中監選有牂柯謝
鳳節仁奏罷漢官專任首領公上其挾奸樹黨俶擾蕃落
天子悟焉再使置吏遠夷騷而旋定舊貫改而復完又駟
牧在野攘竊是繁耗以歲月莫之禁禦公輶車上隴羣慝
畢露表監官斛斯果之輩奪職者九人沒賊者萬計牧圉
知禁思無邪矣開耀閒吐蕃侵境師旅不給乃購運酬勲
募耕入選利之所在詐亦居焉公與大理正王守一於河
蘭鄯廓四州推獲僭耀王希古盧種王誕其徒二千餘人

正處其罪爰得我直授監察御史內難去職居喪過毀死
孝貽憂光宅初肇建兩臺分典百郡服闕授右臺監察御
史巡察河南澄清郡邑昇賢弊罪能執其中類功最加兩
階拜右肅政殿中侍御史郎官法天古難其選具美斯在
再拜司勳員外郎永昌中遭凶黨網羅爲周興所奏貶溫
州固安令州特舉清白改鴻州櫟陽令邑多猾人屢宰敗
駕公威簡有素誠結無欺率是而行人用不擾獄犴自靜
狼戾反慙詔書嘉譽加朝散大夫又羅密徒貝錦爲河內
所鞠降括州員外司倉尋而事白進吉州司馬神龍中興

官反舊政窮鱗沛而縱壑墮羽翼而順風拜司門郎中兼
衛王司馬無何正除衛王司馬拜太子左庶子以節愍之
禍出爲涪州刺史未往又轉廬州司馬致仕久之景龍中
復起左諭德兼榮文館學士詔曰公縉紳書彥操履清淳
令譽播於始終嘉績宣於中外儲闈諭論雅望尤高宜申
朝典俾加徽服可銀青光祿大夫又攝詹事東都留守拜
常州刺史居歲餘優詔致仕享年八十先天元年仲冬薨
於河南之正平里第遺令近地便葬斂以終服開元二年
冬卜葬於伊闕之西夫人河東縣君柳氏祔焉禮也公出

入四朝歷官二十其進也皆擇能錄勤惟德是與其退也必含垢受屈在涅不淄子文之量從可知矣凡撰淳孝友悌傳各一篇以匡儲后撰先君親友傳十卷以篤故舊撰家譜家誌各十卷以明系本撰河南巡察記十卷以辨風俗非通理博物立誠錫類其孰能見志以著書因事以設誠若斯之盛也有文集十卷行於代初公侍祠清廟有髦士之宜而先考偃師贈蒲州長史自祖考三葉瑩無碑記公諮諸通儒而追建銘碣幽趙之士以爲美談夫爲子則頌德以尊祖飾終以榮親孝之大也爲臣則不枉毫髮以

顧私不避豺狼以撓法忠之至也潔志則利不涉口欲不
萌心清之源也履道則不俛眉以悅勢不屈色以苟容正
之方也詩曰仲山甫舉之公有其德傳曰左邱明恥之公
有其直總是四善遠齊二賢於是芬苾令問優游眉壽惠
風激於勝流丕績敷於哲后然以忤彼權貴保茲介特不
登三階以正四國貞白之士慨焉太息其孤總授充窮泣
血靡所寘懷俾予作頌布哀豐石恭惟先人之寮友常奉
長者之話言公雅珍確實不尚華靡敬慎風規直紀行事
業廣詞編萬無髣髴少子授八分之妙獨善當時公平日

惠愛故存之刊刻詞曰

我我淑德克生休命履孝蹈忠含清體正如玉之潔如金
之鏡高明洵美學以潤之官方正事靜以鎮之嚴嚴憲府
公三峻之赫赫儲官公三訓之道有行廢時有泰否三入
三出無愠無喜鼓缶而歌懸車致仕全歸葬儉允也君子
西山幽幽東川悠悠雲過墳闕風薄松楸人亡道存榮往
哀留貽世作則行歸於周

欽定全唐文卷二百三十目錄

張說十

贈陳州刺史義陽王神道碑

贈太尉益州大都督王公神道碑奉勅撰

唐故贈齊州司馬陸公神道碑

故開府儀同三司上柱國贈揚州刺史大都督梁

國公姚文貞公神道碑奉勅撰

鄭國夫人神道碑奉勅撰

鄭國長公主神道碑銘

河西節度副大使鄯州都督安公神道碑銘

并序

贈廣州大都督馮府君神道碑銘

后土神祠碑銘

西嶽太華山碑銘

欽定全唐文卷二百三十

張說十

贈陳州刺史義陽王神道碑

昔高祖之起唐侯革隋命太宗之威四海正萬邦作藩帝
家用建王國二十一族堯之昭也十有一宗文之穆也王
諱琮字某文帝之孫紀王之子龍種異品鳳毛秀色仁義
天啟德威日就學無不探藝無不究故齊王之允以爵推
恩周公之子以才分政總角封義陽郡王弱冠拜歸州刺
史又守檀州又撫沂州若敖之舊荆人是懲單于之衝胡

馬自遠淮沂其父邦國不空遭王運中微投於南海書稱
大去憫失土之諸侯禮不逃誅義無辜之王子某年月日
邁六道酷吏薨於桂林之野春秋五十神龍之初興廢繼
絕追贈陳州刺史王生不得志沒受遺榮信乎才之短長
不如命之豐約德之輕重不如藝之厚薄有矣季子豫州
刺史行休髻齒羈孤託身炎厲藐是餘慶巋然獨存泣血
上請迎喪遠裔開元四年二月至桂林王同氣三人往偕
遇禍殞殮無主封樹缺如歲月茫茫盡爲野草問鄰母而
失處訪樵童而莫識議者以爲不可復得宜招魂而葬行

休拊心蒼昊誓不徒還乃掃亭館設地席潔齋懇惻覲乎
幽報遂頻夜髣象曲示其端夢魯王乘舟舟分爲兩旣而
適野見東洲中斷因忽悟焉陰隱微明率此類也又靈堂
鎖莖一夕自屈管上有三指凹迹一竒二並其傍鐵生文
理布列成卦衆駭其異使善易者張法著之曰屈者於文
爲尸出指者於義爲指蹤一竒二並三殯近闊若引渦山
揆之可以察先王之心矣考夢協卜定處剋辰以其月二
十八日於桂城東洲發見神柩舉體咸備而一節闕焉行
休甚痛惋若自毀裂其夜又夢王告在南洛州厥明直舊

殯而南十有九步沙洲痕下掘而得之安合如故他日北郭之外併收二叔父焉於是乎驗著夢之有徵也子子三旄連舳歸飛遙遙百越經途瞻歎零桂人士以爲美談夫至孝潛通精魂昭應果虛無之見推步而有必窈冥之體尋求而致雖前誌所詳未有幽感反覆若斯之昭晰矣以某年月日陪葬於昭陵柏城妃汝南周氏祔焉禮也妃考曰駙馬都尉梁郡襄公妣曰臨川大長公主宗周元胄大君自出左右圖史循環法度邦有好逮室無偕老以王之故薨於掖宮初永昌之難王下河南獄妃錄司農寺惟有

崔氏女屣布衣往來供饋徒行頽色傷動人倫中外咨嗟目爲勤孝王之二子配在雋州及六道使之用刑也長曰行遠以冠就戮次曰行芳以童當捨芳啼號抱行遠乞代兄命旣不見聽固求同盡西南傷之稱爲死悌君子謂勤孝者仁之厚也死悌者友之難也感神者誠之至也此三者有以見義陽之義方賢妃之內訓繼體之崇德夫如是淳美上歸乎本朝盛烈延耀乎邦族安可闕而不飾碑版無文而已哉銘曰

高邱白雲惟堯大理函谷紫氣維周柱史百代福流千齡

運起富有海內貴爲天子聖帝才子於穆紀王賢王祚允
倬哉義陽慎徽九德九德有常允釐三郡三郡以康明夷
于飛丹厓之下梁木其壞桂林之野不識阡陌無存松檟
於以求之人無知者哀哀孝子眷眷靈夢語妙常閭文微
甄仲南洛占從東洲億中舊窆移編新棺改贈旣克返葬
亦祔山陵卜云其吉神心允憑人非地是迹謝名稱青青
松柏不顯不承

贈太尉益州大都督王公神道碑奉勅撰

維天命帝子萬邦維坤配乾母萬物以親九族后父之屬

尊以敘百官開府之班最執謙德而光重地者則祁國公
其人也公諱仁皎字鳴鶴太原祁人王子賓天啟靈仙之
族司徒衛漢大忠義之門盛德之後仁賢繼出曾祖景孝
隋屯田侍郎祖詮歙縣男贈汾州刺史考文洎贈右僕射
纘戎前列啟迪後人公之生也膺汾霍之禎體敦龐之度
禮樂狃於代襲忠孝萌於自然克寬克恭不激不傲鑒窮
未兆而養之以蒙智周無際而處之以默故質勝於文行
過於譽其隱德也三年不鳴其會時也一日千里初以翊
衛調同州參軍換晉州司兵應將帥舉授甘泉府果毅遷

左衛中郎將上昇春宮后正妃壹擢將作大匠事時工練
八材孔修轉太僕正卿騶訓車攻六飛如舞先天內禪引
伸外戚懷柔畏滿厭劇思閑公旣深辭以職事上亦優之
以散秩廼加特進禮異羣公乃拜開府儀同三司策上柱
國封祁國公邑戶三千實賦三百公於是寓情宴喜簡跡
朝行入告嘉猷密而人莫窺也陰薦多士晦而人莫知也
不自異於當路每同塵於衆流常語所親曰明明天子擇
賢共理瑣瑣姻婭則無膺仕不識不知樂我而已善矣夫
人臣位極遇莫大焉王曰外舅厚莫重焉而能明道若昧

進道若退事不事而縣解爲不爲而理會一以無目牛之
全一以無亢龍之悔所謂言合古行中權歟後之人慎終
始而保福祿者固將沿通波而蹈高軌也享年六十有九
開元七年歲次己未四月己未朔廿日戊寅薨於京師皇
上悼焉設次大臨輟朝累日榮之以華袞寵之以飾終追
贈太尉益州大都督賜東園祕器含襚贈錫率加常禮乃
命尚書彭城侯劉知柔攝大鴻臚俾之監護京兆少尹崔
琬介焉申命詹事南安侯龐承宗持節弔祭左庶子白知
慎倅焉公卿命士更弔迭唁溢巷填街爲之縞素粵以十

金史卷之二十一
三
月初吉葬我昭宣公羣官執紼祖奠國門如前會夫天作
聖合必起大邦故軒妃美於西陵周婦表於東海公藩衍
之慶祚允二十或哲或謀或肅或乂永錫之類也如是元
女祥發望雲業參練石內被螽斯之德外偃關雎之化門
風之至也如彼長子惟力戴君畢心禦侮奉雲雷之會懸
日月之功庭訓之致也如此高陽有才子八族我盈其二
武王有理臣十人家出其兩稽諸舊史罕或前聞若乃積
三盛事而重之以純德篆於金石垂於億萬宜哉其文字
光華撰錄旨要則皇帝所爲也詞臣奉詔作之銘曰

於穆祁公誕靈信厚有倬其慶天子外舅高以卑牧盈將
沖守忠焉孝乎沒而不朽人之忠孝其德不回天俾純嘏
大福時來貴踰九列榮並三台祚之元社帝曰欽哉祁公
之德柔嘉維則令儀令色小心翼翼如何昊天喪此邦式
休問其永豐石是刻我思肥泉孝心罔極

唐故贈齊州司馬陸公神道碑

公諱孝斌字順姓陸河南洛陽人也其先帝嬀啟姓陳胡
立族敬仲之孫有齊國宣王之弟封陸鄉蓋命氏之所由
興也秦并諸國陸氏分適燕吳在燕者魏文成帝時東平

成王俟生平原簡王麗重世游美爲國之華公即簡王七
世孫也曾祖彥昇北齊以文藝高選任祕書郎以至德表
所居號終孝里祖元亮隋鷹揚郎將父淳感盤桓利貞弓
招莫進同志誅行諡爲惠康孝悌仁義世不殞矣公誕靈
沖和稟識高朗簡而中禮易而達節篤學勵行著實飛聲
文史者宗其淵府德行者仰其牆仞舉國子明經選絳州
參軍始州司法其在官也示人親其親長其長不苛察而
小無廢不皎異而大有成知識日明常憺如也喪親過哀
因中風廢臥疾累年不起楚邱肇封大羅雲逸雖沈疴未

彌而僉望允歸授楚王府兵曹參軍實有躬降師賓之禮
目擊儀刑之訓府罷換趙州錄事參軍以病去職聖厯元
年匈奴入趙公危邦不處盡室以行望河南而將濟至黎
陽而疾甚年六十有二十月丁未終於姚邨之逆旅歸殯
於滏陽之郭北先天二年皇帝踐祚以故吏贈齊州司馬
惜哉用公之道行公之志上可以序三光下可以平九土
存則位不充其德沒則榮不逮其身命矣夫夫人范陽郡
太君盧氏故岐山丞元瑾之女恭儉之德備貞信之教興
妻道母儀自家刑國享年七十有六開元六年十一月丁

未終於洛陽之宣教里八年五月丙子合葬於漳北之神岡禮也初咸亨中王師征遼公參是軍事友人太原王守義遇疫於海東路艱寇阻兵危勢急公獨顛沛致喪歸其井邑其在安州也朝廷以公精達法理乃命覆囚劍南梁岐冤繫動盈千百丹筆所詳十全八九其捨生徇義返已施仁皆此類也禮莫重乎飾終於是見其不朽矣善莫大乎餘慶於是知其有後矣四子伯玉仲容叔獻季良泣血銜恤視天若墜俾予作頌式昭遺懿銘曰

曠哉陸公觀奧臻妙文雅外炳清明內照從政本仁資忠

移孝不言而理正身作教才何富之命何負之居喪柴毀
遭疾棲遲垂彼雲翼落此盛時沒後榮進終延贈寵德之
休明位匪爲重嗟嗟千載賢士之隴

故開府儀同三司上柱國贈揚州刺史大都督梁
國公姚文貞公神道碑奉勅撰

敘曰八柱承天高明之位定四時成歲亭育之功存畫爲
九州禹也堯享鴻名播時百穀棄也舜稱至德由此言之
知人則哲非賢罔乂致君堯舜何代無人有唐元宰曰梁
文貞公者位爲帝之四輔才爲國之六翮言爲代之軌物

行爲人之師表蓋維嶽降神應時閒出者也公諱崇字元之姚姓有虞之後遠自吳興近徙於陝今家洛陽焉烈考長沙文獻公樹勛王室建旗舊府公紃綺而孤克廣前業激昂成學榮問日流武庫則矛戟森然文房則禮樂盡在弱冠補孝敬挽郎又制舉高第厯佐濮鄭並有聲華入爲司刑丞天授之際獄吏峻密公持法無頗全活者衆進夏官員外郎郎中侍郎朝廷曰能遂掌軍國遷鳳閣侍郎監修國史兼相王府長史始則天人讓王承置醴之願終以飛龍利見延參乘之恩自時厥後恒當大任凡三處兵部

尚書三入中書令一爲禮部尚書左庶子又肅政大夫總
靈武軍兵馬又司僕卿知隴右監牧使出典毫宋常越許
申徐潞揚同十郡景雲初以藩邸舊僚封梁國公食賦百
室公性仁恕行簡易虛懷汎愛而涇渭不雜真率徑盡而
應變無窮常推是心以御於物故所莅必甞庶風偃驚狼
化從言不厲而教成政不威而事理去思覩頌來暮聞歌
旣登邦政卒乘輯睦及在宗伯神人克諧今之中書是爲
理本謀事兼於百揆論道總於三台公執國之鈞金玉王
度大渾順序休徵來臻懋德格天名遂身遜拜開府儀同

三司崇其秩逸其志也初太夫人在堂公授職西掖頗限
局禁求侍晨昏優詔旣許尋令還職公固請以泣制曰家
有令弟足慰母心國有棟臣安可斲闕其後剖符江表敦
諭起復衰麻外墨藥棘內毀變禮中權通識所貴神龍之
首預聞興復疇其并賦累讓而停夫以革故鼎新大來小
往得喪而不形於色進退而不失其正者鮮矣君子曰忠
不忘親仁也哀不違事義也讓功辭邑禮也濟代全名智
也仁以長人義以和下禮以安上智以周身宜其光輔四
帝軒冕三紀池臺琴筑優游暮齒傳爵土於祚允保祿位

於終始矣享年七十有一開元九年九月寢疾薨於東都之慈惠里皇上悼焉國人慕焉撫牀輟春曾未云比制贈揚州大都督諡曰文貞禮也十年二月葬於萬安山之南原在疾也王人賜膳御醫視藥於薨也中使弔臨羽儀哀送君臣之義厚莫重焉子昇子弈思綴遺美以寘罔極有詔掌文之官敘事盛德之老銘功將以寵宗臣揚英烈帝乃洒恩仙翰鏤澤豐砥日月臨照於佳城烟雲變態於神道寶其文字別爲羣玉之山禁其樵蘇即表三司之墓銘曰

源深自虞派別從吳避地魯陝居家洛都神明遠契嶽瀆
冥符翊聖斯偶生賢不孤仁將勇濟孝與忠俱學刃攢植
文鋒迅驅纔安卑位即騁長途惟實惟有若虛若無再三
軍國一二訐謨戎柄尤重王綸最樞兼司任切久政榮殊
黼藻彌煥丹青靡渝以寬容物以鑒分區外或形放中恒
禮拘箴雖誠口諍亦忘軀但覩渾璞誰詳瑾瑜伊臯尺寸
管樂錙銖名正身遂言誠願孚方辭漢祿更辱齊租旣積
而散窮歡盡娛川歸東極日去西晡上惻旒宸傍悲路衢
藍田美玉荔浦明珠載廣休慶爰宏典謨豐碑乃立盛業

其鋪帝念頻軫仙毫特紆鑄金刻石鳳篆龍圖七曜光動
三泉澤濡銓能敘事理鬱詞敷求舊銘實慚殫恧蕪緬思
雲霧尚想江湖有道之德其何以踰延陵之墓空此嗚呼
存沒終始遐哉邈乎

鄭國夫人神道碑奉勅撰

鄭國夫人者宏農楊氏之女也開元神武皇帝惠妃之母
曾祖諱諶以禮樂習文爲越州司馬祖衍以折衝學武爲
游擊將軍父宏以門才入仕爲雍縣丞而早卒初則天之
代夫人言歸武氏曰恒安郡王生惠妃及家令忠太子僕

信開元十年三月終於通化里其四月卜宅於少陵原哀
子銜恤號旻仰訴怨報德而未待託思齊於永慕皇帝悵
鸞殿之內憂悵鶴池之外慘揚淑聲而金石刻揭高行而
天地感國史司文命爲鄭志若夫清明下濟嶽瀆上昇祥
會德門慶育邦媛神授孝理之性天啟聰達之心加以潤
澤詩書游玩圖傳伯宗好直預戒將亡重耳羈游先稱必
霸豈直漢庭章奏假借仲長之才周官禮儀咨稟宣文之
學昌言嘉論有如此者螭首螭領修省橫波旣工嘖笑易
爲容止肅恭而不跼舒和而不倨商周革命遇屯有怡懌

之顏桑霍倣予在貴無驕矜之色端容一貌有如此者絃
綖祭服闕翟朝衣纂組入神翦制驚國雕胡之飯露葵之
羹五齊六清三鸞七醢咸一見而洞理或不習而知和女
工中饋有如此者惠妃載誕皇子在者四人驪泉多龍丹
穴皆鳳克岐克嶷預見元凱之才實覃實訐早聞霄燭之
艷亦關陰德之潛襲胎教之密傳乎又名子以義成家以
禮忠者以令德爲忠信者以不欺爲信傳云去食存信信
而有徵經云移孝爲忠孝則不匱周宗咸覆紀季獨存至
德深圖有如此者壁司徒之妻邑其合禮南城侯之婦封

其舊功況夫睿徽四德四德咸舉經綸二義二義克從匿
武收繼趙之勲產姚承配夏之慶吹凱風於椒掖外王母
於梧宮盛德大業窮光極寵啟國西鄭不亦宜乎十數年
閒二子榮立每至四時令節六參嘉會魚軒照門龜艾交
室爲壽則珠貝山積侑幣則錦綺霞飛白玉滿堂聚姻親
而同有黃金作穴散鄰里而無餘君子欽其市義聖人嘉
其寶儉故寢疾則飲食天廚湯藥御府匪日伊夕上官絡
繹於闔庭送終則威儀傾都車騎矐目自宮徂野中使相
望於道路哀榮之盛書記罕聞猗歟所謂小君之遺美聖

善之高烈者也如使後代考南史議西陵披簡牘而歎息
臨山原而茫昧旌賁之道不其闕而然則外孫之碑武擔
之石非明淑之壟其何設焉辭成進御帝稱曰善顧謂尚
札我其書之於是洒翰黃縑鏤字青琬雲橫波蹙神變艷
爛於山門鶴倚鸞翔生氣宛延於松路禮尊事絕恩榮迹
遠斯又元德動天幽誠迴日之奇致也誰昔未覩名言莫
逮係曰

代有母德厥氏楊兮祖考爲士父爲王兮聖后中葉總萬
方兮天命未改復歸唐兮賢淑啟佑繼絕亡兮宗周雖滅

神女昌兮建號西鄭榮舊鄉兮魚軒翟第盛龍光兮二子
雙飛華綬章兮出入輪奐庭韓煌兮去此昭昭即茫茫兮
何處詔葬少陵阜兮貴妃慈親侯王舅兮寒暑流易山川
久兮古墳坡陁老樹朽兮壽宮靈寢百代守兮頌石光華
千載後兮

卽國長公主神道碑銘

臣聞堯有娥英承九族之敦序舜有霄燭動百里之光耀
大聖之後天必縱之積善之家神所慶矣豈惟上帝之女
雲漢爲靈平王之孫肅雍其德連華前志代有其人皇唐

鄔國長公主者睿宗之第七女也母曰崔貴妃構累聖而成門合濟美而爲室蘊乾坤之純粹演日月之清明神媛誕靈常言所絕免懷之歲天奪聖善不食三日哀比成人文母流胎教之慈曾子得生知之孝由是宮闈延矚邦國遠聞及乎玉笄耀首油輶在馭錫之美地邑以荆山求之令族嬪於薛氏爾其居玩圖史動修法度服其澣濯恭儉之教興鼓其琴瑟敬讓之風被其行己也安親惠下之謂仁敬宗合好之謂義降貴接卑之謂禮恕情周物之謂智推心而行罔不該備其理家也視膳饗餼之均和主饋醴

醢之品齊絲竹七音之徽靡纂組九華之縟麗經目所涉
罔不精詣每至三元上賀五日中參進對詳華折旋舒婉
故以式瞻貴里儀範通門如千花之汎惠風百卉之涵膏
露窈窕之宜克舉繁衍之福大來有男子四女子五瑤碧
生階芝蘭滿室者也習禮明詩日漸庭闈之訓銀章艾綬
地連恩澤之侯自先朝徹宸之辰迄公主成笄之日外除
過制內疚餘哀手寫金字梵經三部躬繡綵線佛像二鋪
貝葉真偈現心相於銀鈎蓮花妙容呈意生於玉指孝思
惟則道遠乎哉開元繼明推恩由已進封鄔國長公主食

邑一千四百戶田賦廣而彌儉禮秩尊而益恭其後君子
晨歌夫人晝哭未亡爲稱生意盡矣撫視遺孤將守柏舟
之誓志祈剝落永從柰苑之遊朝制斷恩改降鄭氏陵谷
可移隋和之德不昧寒暑有遷松竹之性如一均養七子
庥蔭二宗汾陰之室忘亡滎陽之黨相慶旣而善福虛應
寢疾彌留盡國醫之技遠方畢至供御府之藥中使相望
命之必至不可支也堂邑山林忽焉瘁色平陽歌舞適足
愁人開元十三年二月庚午薨於河南縣之修業里春秋
三十有七震悼紫庭哀傷朱邸傾家若墜舉國同悲有詔

光祿卿孟溫禮監護喪葬京兆尹馮延休副焉窀穸之禮
一如涼國長公主故事夏四月恩旨陪葬於橋陵不祔不
從古之道也皇上念同氣之致美感閱川之永謝恨棣華
之半缺悲瑤草之先化乃命國史昭銘懿迹降恩禮於雲
露寫哀詞於金石水非湘渚還起帝子之祠山是洛陽即
封天妹之冢銘曰

帝系白雲僊源紫氣漲家成國承天作貴赫赫聖祖曰文
曰武皇皇睿宗一變萬邦挺生淑媛慈和孝恭清臚如神
娥睂無雙邸第立官湯沐建封年及笄總禮施環珮鳴鳳

獻祥乘龍擇對帝唐降女天乙歸妹珠玉過庭蘋蘩正內
蛟門早闐龍湖忽上無地何載無天何仰金殿書經華絲
繡像欲報之德昊天罔極孰是言歸良人永違銀爐烟斷
羅幕霜飛懇願毀形託身壞衣不諒人只改嬪他士稟命
曰從從人曰順息媯繩楚懷羸霸晉反經合權與道同韻
燠休二室均懽等潤四海謐清九族和平萬物向榮眾雛
未成心戀盛明形隨落英祖載鼎城歸窆咸京挽歌敷聲
鹵簿凶行哀哀聖情惻惻同生橋山片石千秋令名

河西節度副大使鄯州都督安公神道碑銘

并序

公諱忠敬字某武威人也軒轅帝孫降居弱水安息王子以國爲姓世高之遼漢季自河南而適遼東高陽之受魏封由陰山而宅涼土高陽王同生尚書左僕射河澗公原晤真河澗生建節將軍西平公纘從正西平生龍驤將軍黃門侍郎廣宗侯薛晤徵累葉勲華載於魏史高祖何藏器廣宗之子也周開府儀同三司寧遠將軍肅州刺史張掖郡公曾祖羅方大隋開府儀同三司皇朝贈石州刺史貴鄉公祖興貴右武侯大將軍涼州刺史徙封榮涼歸三國公考文生不仕涼公皇運經綸首平李軌大舉河湟之

地遠通城郭之國寵錫蕃庶冠絕等夷水出渥洼之神文
馬者二千乘山得崆峒之武朱輪者四十人公育榮盛之
門鬱豪爽之氣孝友天至清華玉立幼聚童兒必爲軍陣
之戲長交英俊唯談韜畧之書始以良家子僕射韋公待
價引於帳下安息軍建奇績解褐授游擊將軍臨洮府右
果毅復以善部統御史大夫唐公休璟處之前鋒洪源谷
立異効遷右威衛翊府右郎將兼新泉軍使進本衛中郎
將赤水軍副使兼赤水新泉兩軍監牧使改會州刺史營
田使換松州都督防禦使遷左司禦率兼河西節度副大

使臨洮軍使轉鄯州都督使如故其在軍州傾心下士視人如子無約而親附不言而條理其在農牧大田多稼如茨如梁思馬斯才有驕有皇輸力四朝厯官三紀名參禁衛身任疆場以靜總繁以逸待寇我無亡鏃之費敵有不戰之屈茲所謂一方之干城者也享年六十有六開元十四年十一月二十八日寢疾終於位知與不知莫不隕涕十五年某月葬於烏城之南志公鄉祔先塋也公寬以御衆卑以自牧直而無訐廉而無劌朋友不聞臧否之言家人不見喜愠之色加以心淨三業躬勤八戒推是而行何

往不濟初甘州有舍利沙多禪師道場之四果也嘗云檀
越德充於內神護於外雖冒鋒鏑永無害也及百戰之後
啟手歸全西州士人聞之激厲有子仲璋如璋季璋金璋
重璋庭襲芝蘭喪過樂棘敬奉窀穸備禮儀於文武撰述
家風刻功名於金石詞曰

玉關氣爽金波秋澈涼野蕭條寒山積雪授靈產義精勁
才傑孝固純深忠維剛烈負羽從軍奮飛青雲麾幢按部
惠流時雨總軍挾郡入文出武三十年間式遏戎虜疆場
務靜非公莫鎮金鼓氣雄非公莫震神山與鉞龍池取駿

霹靂陷營衝風入陣勇將知時仁兵善持反耕罷戰王者
之師牧馬如雲屯庾如坻西軍方壯東首長辭振古同嗟
沒而不死所謂明德永傳神理鐘鼎題門珠玉名子信言
豐石令問不已

贈廣州大都督馮府君神道碑銘

夫積德垂裕之謂仁追遠揚名之謂孝仁則慶鍾厥後孝
則榮及其親嘗三復於斯言今於馮府君見之矣府君諱
君衡其先長樂人也釋趙歸秦本家上黨分燕徙越又據
高良自遠祖榮懷化侯業以至於大父贈荊州都督益先

考高州使君智幾咸以勲績建旗本郡甲兵雄於一方政
化沓於千里君蘊含宏光大之德守冲默安貞之志秉難
進易退之操詣希聲若訥之道爲而不有故物譽難得而
稱靜以居常故世榮無由而及以聖厯之歲終於本城子
幼家艱喪禮蓋闕夫人麥氏備母師之六行履先姑之四
德處順思柔以成婦道及衛亡共伯而魯重敬姜誓以汎
舟之詩遵其闔門之禮季子今冠軍大將軍右監門衛大
將軍上柱國渤海郡開國公力士始自齟齬來儀上京旣
違徙宅之歡爰從倍年之訓感三州之深義易百代之因

生捨馮亭之本枝從高侯之令族千秋仕漢遂去田宗隨
會在秦別爲劉氏遇風雲之感會承日月之光輝茅土荅
其勲庸貂璫寵其忠信太夫人踰越嶺嶠就養高堂孝子
展白華之勤慈母欣綵衣之貴精誠所感振古難儔噫歟
資孝爲忠隱心後動引桑霍之深誠慕金張之周密敬以
衛主愛以安親而善不彰官不遂者未之有也由斯言之
則哀樂存乎心不至音改禍福惟所召不以偏覆及詩
云魯侯燕喜令妻壽母明神勞善人而壽其母也夫人以
開元十七年享年八十有七五月十二日壽終於京兆之

來庭里舍天子悼先賢之晦德嘉侍臣之克孝思賙襚之
未崇愴窳窳之將及於是詔贈先府君潘州刺史備禮飾
終招魂合葬是歲也大享宗廟徧謁園陵錫類之恩施於
卿士重贈府君使持節都督廣韶循康等一十六州諸軍
事廣州大都督夫人受邑舊邦啟號南海從夫加贈改封
越國夫人哀榮備於始終寵光洽於中外爲子之道何以
加焉於是與兄左衛中候元璡左領軍衛郎將元珪等惟
舊業之難名感新恩之薦及思建碑表以永芬芳夫毓至
德以庇後嗣仁之厚者也揚令名以崇祖考孝之大者也

仁爲五常之先孝實百行之首貫經教而莫比標人倫而獨出宜其鏤美金石式旌墳隧無忘清徽昭示來葉何必會稽江上獨有紀孝之碑安陵廟前空傳尚德之頌其詞曰

明珠紫貝產於南國代所珍兮允矣君子不耀其德克全真兮慶流我後高驤迴翥中貴臣兮朱轡象服寵及泉路榮其親兮孝道不隕勒銘表墓留芳塵兮

后土神祠碑銘

至哉坤元萬物資生王者母事德合天明義有大報用協

永貞茫茫九土思索其精因天事天因地事地彼汾之曲
高雉傑異景象遺光壇場舊位寂寥千祀精靈永閼誣神
不祥復古維祺文所無者秩而祭之矧曰后土昔載明祠
何必因陰乃爲我師意多漢武跡在橫汾風流可接簫鼓
如聞壽宮創制神鼎勒勲古往今來豈無斯文

西嶽太華山碑銘

嶢嶢太華柱天直上青崖白谷仰見靈掌雄峰峻削齒蒼
森爽是曰靈岳衆山之長白帝西下黃河北來陰陽孕育
精氣徘徊偶聖呈瑞逢昏降災玉池神挹石室仙開海絕

瀛洲天遙元圃偉哉此鎮崢嶸中土鬼神乍游風雲忽聚
高標赫日半壁飛雨自古王者巡方必至龍駕帝服封天
禪地南面會神西后在位待子治國安人然後徐思其事